

Permutas

1. Permutas definitivas

1.1. Contido e requisitos

Poderán autorizarse excepcionalmente permutas entre funcionariado en activo dos Corpos Docentes cando concorran as seguintes condicións:

- a) Que desempeñen con carácter definitivo os destinos que se permutan.
- b) Que acrediten, polo menos, dous anos de servizos efectivos con carácter de destino definitivo nas prazas obxecto da permuta.
- c) Que ambos destinos sexan de igual natureza e corresponda idéntica forma de provisión.
- d) Que o funcionariado que pretenda a permuta conte respectivamente cun número de anos de servizo que non difira entre si en máis de cinco.
- e) Que se emita informe previo favorábel pola unidade administrativa da que dependa cada unha das prazas.

Cando a permuta se pretenda entre prazas dependentes de administracións educativas diferentes será necesario que ambas o autoricen simultaneamente.

No prazo de dez anos, a partir da concesión dunha permuta, non poderá autorizarse outra a calquera dos interesados.

Non poderá autorizarse permuta entre funcionarios cando a algún deles lle falten menos de dez anos para cumprir a idade de xubilación forzosa (65 anos).

Deixaranse sen efecto as permutas se nos dous anos seguintes á data na que teñan lugar se produce a excedencia ou xubilación voluntarias dalgún dos permutantes.



Normativa:

Disposición adicional cuarta do R.D. 2112/1998 polo que se regulan os cursos de traslados de ámbito estatal.

2. Permutas provisionais

(comisións de servizo por petición recíproca)

2.1. Contido e requisitos

Poderán solicitar permuta provisional, dous ou máis funcionarios de carreira, en prác-

ticas ou interinos, en servizo activo dos corpos docentes que impartan ensinanzas escolares, sempre que vaian desempeñar a súa función docente no centro educativo durante o curso académico correspondente.

2.2. Solicitudes

Os profesores interesados deberán presentar unha instancia axustada ao modelo oficial que figura como anexo á orde que regula as permutas provisionais, asinada por todos os funcionarios interesados na permuta provisional.

A solicitude, dirixida ao secretario xeral da Consellería de Educación e Ordenación Universitaria, poderá presentarse no rexistro xeral da propia Consellaría, en calquera das súas delegacións provinciais ou ben na forma prevista no artigo 38.4º da Lei de réxime xurídico das administracións públicas e do procedemento administrativo común.

O prazo de presentación de solicitudes será do 1 ao 10 de setembro de cada ano, ou, de ser o caso, no prazo dos cinco días seguintes ao da adxudicación de destino provisional para o curso académico correspondente.

Unicamente se poderá conceder permuta provisional entre funcionarios do mesmo corpo e especialidade, ou que non sendo titulares estean adscritos á mesma especialidade. Para estes efectos, considerarase o mesmo corpo:

- a) O corpo de catedráticos de ensino secundario e o corpo de profesores de ensino secundario.
- b) O corpo de catedráticos de escolas oficiais de idiomas e o corpo de profesores de escolas oficiais de idiomas.
- c) O corpo de catedráticos de artes plásticas e deseño e os profesores de artes plásticas e deseño.

Considerarase a mesma especialidade aquelas específicas de formación profesional que foron desdobradas en dúas ou tres polo Real decreto 1635/1995, do 6 de outubro, polo que se adscribe o profesorado dos corpos de profesores de ensino secundario e profesores técnicos de formación profesional ás especialidades propias da formación profesional específica

Non se poderá conceder permuta provisional máis de tres anos continuados a un mesmo funcionario agás informe favorable da comisión de valoración.

Non se poderá conceder permuta provisional máis de dous anos continuados aos mesmos permutantes agás informe favorable da comisión de valoración.

A Subdirección Xeral de Persoal, con carácter xeral, resolverá favorablemente as peticións de permuta provisional que non excedan dos anos previstos nesta alínea, e non causen graves prexuízos a terceiros interesados, entre os colectivos que se citan:

- a) Entre os funcionarios de carreira con destino definitivo.
- b) Entre os funcionarios con destino provisional.
- c) Entre os funcionarios con destino definitivo e con destino provisional.

As restantes peticións serán outorgadas se contan co informe favorable da comisión de valoración.

No caso de que a permuta concedida causase graves prexuízos a terceiros, poderá ser revogada coa finalidade de evitar os citados prexuízos.

A resolución, que porá fin ao procedemento, será motivada cando rexeite a petición dos interesados

Transcorrido un prazo de tres meses, contados a partir da data de presentación da solicitude, sen que recaese resolución expresa, entenderase desestimada a permuta provisional.

2.3. Toma de posesión

Será a que dispoña a Consellería de Educación e Ordenación Universitaria nas súas normas reguladoras de comezo de curso.

2.4. Duración

A vixencia da permuta provisional será dun curso escolar, sen prexuízo das prórrogas, que se poderá conceder, logo de solicitude do interesado, no suposto de persistencia das circunstancias que motivaron a súa concesión.



Normativa:

Orde do 17 de xuño de 2004 pola que se regulan as permutas provisionais, por petición dos interesados, dos funcionarios dos corpos docentes en centros dependentes da Consellería de Educación e Ordenación Universitaria. (DOG de 5 de xullo de 2004)